

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06 76/07, 81/07, 94/07 i 24/08) i člana 4. stav (3) Zakona o Agenciji za identifikacione dokumente, evidenciju i razmjenu podataka Bosne i Hercegovine ("Službeni glasnik BiH", broj 56/08), a u vezi sa članom 16. Pravilnika o načinu pristupa evidencijama i razmjeni podataka ("Službeni glasnik BiH", broj 35/09), Vijeće ministara Bosne i Hercegovine, na 120. sjednici održanoj 29. aprila 2010. godine, donijelo je

## **ODLUKU**

### **O VISINI NAKNADE ZA PRISTUP PODACIMA IZ EVIDENCIJA AGENCIJE ZA IDENTIFIKACIONE DOKUMENTE, EVIDENCIJU I RAZMJENU PODATAKA BOSNE I HERCEGOVINE**

#### **Član 1. (Predmet)**

Ovom Odlukom propisuje se visina naknade za pristup podacima iz evidencija koje vodi i tehnički održava Agencija za identifikacione dokumente, evidenciju i razmjenu podataka Bosne i Hercegovine (u daljnjem tekstu: Agencija), u skladu sa Zakonom o Agenciji pravnim i fizičkim licima, način plaćanja i druga pitanja koja regulišu odnos između davaoca podataka i korisnika podataka.

#### **Član 2. (Visina naknade)**

(1) Za povremeni pristup podacima iz evidencija Agencije pravna i fizička lica, u skladu sa Pravilnikom o načinu pristupa evidencijama i razmjeni podataka, plaćaju naknadu 5,00 KM po jednom pristupu.

(2) Za stalni pristup evidencijama Agencije, putem web servisa, pravna lica plaćaju pušalnu naknadu u iznosu od 3 KM po jednom pristupu.

#### **Član 3. (Način plaćanja naknade)**

(1) Za povremeni pristup podacima naknada se plaća na način da se prilikom podnošenja zahtjeva za pristup podacima na odgovarajućem Obrascu br. 1 koji je sastavni dio Pravilnika o načinu pristupa evidencijama i razmjeni podataka, dostavlja i dokaz o uplati administrativne takse (primjerak uplatnice).

(2) Za stalni pristup podacima, do 05. u tekućem mjesecu dostavlja se dokaz o uplati naknade (primjerak uplatnice) za prethodni mjesec. Agencija i korisnik stalnog pristupa će posebnim ugovorom definisati način obračuna i plaćanja naknade. Obračun naknade, ispostavljanje fakture i plaćanje vrši se na mjesečnom nivou korištenjem modula "Potraživanje" Informacionog sistema finansijskog upravljanja.

(3) Naknade po osnovu stalnog i povremenog pristupa podacima Agencije, uplaćuju se na jedan od bankarskih računa Jedinstvenog računa trezora u skladu sa Naredbom o izmjenama i dopunama Naredbe o uplatnim računima za administrativne naknade ("Službeni glasnik BiH", broj 21/10), uz obavezno navođenje

vrste prihoda 722884 i šifre budžetske organizacije 0709999 i ostalih uplatnih elemenata iz pomenute naredbe.

(4) Prihodi ostvareni po osnovu navedenih naknada predstavljaju prihode budžeta institucija BiH.

#### Član 4.

(Odbijanje i zaustavljanje pristupa podacima)

(1) U slučaju neispunjenja obaveze plaćanja naknade kod povremenog pristupa, Agencija će odbiti zahtjev za prijenos podataka, o čemu će se donijeti rješenje u skladu sa Pravilnikom o načinu pristupa evidencijama i razmjeni podataka.

(2) U slučaju neispunjenja obaveze plaćanja naknade kod stalnog pristupa, Agencija će zaustaviti daljnji prijenos podataka na način definisan posebnim sporazumom koji se zaključuje sa pravnom licem, u skladu sa Pravilnikom o načinu pristupa evidencijama i razmjeni podataka.

#### Član 5.

(Prestanak važenja ranijih propisa)

Danom stupanja na snagu ove Odluke prestaje da važi Odluka o načinu prijenosa i visini naknade za pružene usluge davanja podataka iz centralne evidencije podataka državljana Bosne i Hercegovine ("Službeni glasnik BiH", broj 82/05).

#### Član 6.

(Stupanje na snagu)

Ova Odluka stupa na snagu osmog dana od dana objavljivanja u "Službenom glasniku BiH".

VM broj 101/10  
29. aprila 2010. godine  
Sarajevo

Predsjedavajući  
Vijeća ministara BiH  
Dr. **Nikola Špirić**, s. r.